

# Usah sebar, percaya berita tak sahih keadaan Tun M

Orang ramai diminta tunggu maklumat terkini, terus doakan bekas PM

Oleh Nor Azidah Mokhtar dan Latifah Arifin  
bhnews@bh.com.my

**Kuala Lumpur:** Orang ramai diminta tidak terpengaruh dengan berita tidak sahih mengenai keadaan kesihatan bekas Perdana Menteri, Tun Dr Mahathir Mohamad yang sedang dirawat di Institut Jantung Negara (IJN) sejak kelmarin.

Setiausaha Politiknya, Abu Bakar Yahya, berkata orang ramai perlu menunggu maklumat perkembangan terkini daripada pihak yang sewajarnya terutama IJN yang mengendalikan rawatan Dr Mahathir.

"Saya tidak dapat ulas perkembangan Dr Mahathir (semalam), disebabkan tidak berada di sana (IJN).

"Sebagaimana saya tegaskan, jangan dengar cerita yang bukan-bukan, sebelum ini IJN sudah mengeluarkan kenyataan," katanya kepada *BH*, semalam.

"Saya ingin jelaskan kepada semua, jangan terpengaruh dengan berita tidak sah. Yang penting doakan kesihatan beliau bertambah baik. Terima kasih semua "

Abu Bakar Yahya,  
Setiausaha Politik



Sebahagian petugas media membuat liputan perkembangan keadaan Dr Mahathir yang dimasukkan ke IJN sejak kelmarin. (FotoAsyrafHamzah/BH)

Abu Bakar berkata, terlalu ramai yang menghubunginya untuk mengetahui keadaan kesihatan Dr Mahathir.

"Saya ingin jelaskan kepada semua, jangan terpengaruh dengan berita tidak sah. Yang penting doakan kesihatan beliau bertambah baik. Terima kasih semua," katanya.

Sementara itu, Menteri Komunikasi dan Multimedia (KKMM), Tan Sri Annuar Musa dalam satu hantaran di Twitter, semalam,

turut meminta orang ramai tidak menyebarkan sebarang berita tidak sahih mengenai keadaan bekas Perdana Menteri itu.

"Dimohon orang ramai tidak menyebarkan apa-apa berita mengenai keadaan Tun M, kecuali datang daripada keluarga atau hospital secara rasmi.

"Hormati situasi keluarga Tun saat ini," katanya.

Annuar berkata, sebaiknya seluruh masyarakat berdoa supaya rawatan Dr Mahathir ber-

jalan lancar dan segera sihat sepenuhnya.

Petang kelmarin, anak sulung Dr Mahathir, Datin Paduka Marina memaklumkan keadaan bapanya stabil dan memberi respon yang baik kepada rawatan lanjutan prosedur elektif yang dijalankan pada 8 Januari lalu.

Untuk rekod, Dr Mahathir sebelum ini dibenarkan keluar dari IJN pada 13 Januari selepas dimasukkan ke pusat perubatan itu, 7 Januari lalu.

"Dimohon orang ramai tidak menyebarkan apa-apa berita mengenai keadaan Tun M, kecuali datang daripada keluarga atau hospital secara rasmi"

Annuar Musa,  
Menteri Komunikasi dan Multimedia

